

Hatetepewewewe

Kenne ihr das Gschichtli au
Vom Computermaa und sinere Frau
Die Frau und dä Computermaa
Hän Computerbuschi welle ha

Druff schpiile si s Computerschpiil,
Kligge sich aa und lache viil
Und online übers Internet
Kaufe si e Buschibett

Und wo s Computerbuschi scho
Glii drno uf d Wält isch ko
Härzig, rosig, kugelrund
Pfundig, gsund und kunterbunt

Hets dr Babbe still und froh
Fiin in sini Arme gno
Und het sich gfrogt, wie dä gleini Gsell
Ächt am Beschte heisse söll

D Mamme, die het die Idee,
Dr Babbe findet s schwer ok
Druff hän s en tauft bim z Vieritee
Uf Hatetepewewewe

dr Hatetepewewewe
So eine het no keine gseh
So wunderfitzig fräch und schnäll
So genial und megahäll

Am liebschte het er lut und wild
Vom Morge bis in Oobe gschpiilt
In Hinterhöf und uf dr Schtrooss
Isch für ihn am Meischte los

Uff Trottoir und uff Wisehäng
Uff Pauseplätz und Huusiigäng
Au uff dr Bauschtell näbedra
Het är si Wöhli welle ha

Ob in de Bäum vo s Nochbers Garte
Ob in private Tiefgarasch-lifahrte
Es hätt em gfalle uff dr Wält
Doch het me ihm die Freud vergällt

Het zum Bischpiil eine gseh
Wie dr Hatetepewewewe
Über Gartzüün isch klätteret
Het sicher sone Tschättere gwätteret

Ganz egal, mit was er kunnt
Irgend öpperem wird s z bunt
Ob mit em Brätt, ob mit em Ball
Eine kriegt e Wuetaafall

Und macht er irgend öppis Glatts
Denn hets für unsre Schatz kei Platz
Denn wenn er dusse schpiile will
Heisst s: He verschwind, sig äntlig schtill

Em Hatetepewewewe
Däm schtinggt das Läbe meh und meh
Will sone lut Computerkid,
Das wän die grosse Mensche nit

Drum isch er hei und het sich z Nacht
E gleini, graui Muus aaglacht
Die seit, du muesch nit truurig sii
S git uff dr Wält e Dorf für di

Dört machsch du, was du mache willsch
Egal ob phantasiersch odr was du schpiilsch
Ob uff em Skateboard Runde drüllsch
Ob uf Entdeggigsreise Monschter killsch

Dr Hatetepewewewe
Dä findet die Idee okay
Är seit dr alte Wält adee
Vo denn aa het en kein me gseh

Denn är isch irgendwann im Jänner
Verschwunde imme warme Scanner
Dä het en digitalisiert
Und denn in e Computer gfuehrt

Und uf dr Datenautibahn
Do schwirrt er umme imme Affezahn
Do het er alles, was er wött
Är isch deheim im Internet

Jetzt schwätzd em äntlig kein me dri
Me kliggd sich eifach binem ii
Du kasch das im Computer gseh
Bi Hatetepewewewe

Är seit es wurd em gfalle do
Är wurd do in Friide glo
Und er hätt e huffe Fründe scho,
Är wurd erscht wieder ummeko
Wemme Kinder duss wurd schpiile loh

Dr Hatetepewewewe
Dä kasch du ummelaufe gseh
Als gleine Compiutermäa
Und s Gschichtli foht vo vorne aa

Aernschd Born
1999 | Liederbuch «Born in Basel» CD 2 |
Dies ist die Fortsetzung vom «Computermännli».